

18/06/2000

Bukan Melayu boleh jadi PM (HL)

Ebi Azly Abdullah; Teh Kean Keat

KUALA LUMPUR: Orang bukan Melayu tetap berpeluang menjadi Perdana Menteri jika diterima semua kaum di negara ini.

Datuk Seri Dr Mahathir Mohamad melahirkan keyakinan, jawatan nombor satu itu tidak akan hanya diisi orang Melayu, apabila rakyat keturunan Cina atau India diterima rakyat.

"Sebagaimana yang kita maklum, Perlembagaan tidak menyebut keturunan Perdana Menteri. Sesiapa saja daripada apa juga keturunan, berhak menjadi Perdana Menteri Malaysia.

"Proses ke arah ini sudah berjalan. Percayalah, jika kita semua sensitif terhadap cita rasa rakyat Malaysia, soal kaum dan keturunan tidak lagi akan menghalang sesiapa pun daripada memegang apa-apa jawatan," katanya berucap merasmikan Perhimpunan Agung MCA ke-47 di Wisma MCA, semalam.

Hadir sama Timbalan Perdana Menteri, Datuk Seri Abdullah Ahmad Badawi; Presiden MCA, Datuk Seri Dr Ling Liong Sik dan pemimpin kanan MCA dan Barisan Nasional (BN).

Dr Mahathir berkata, BN perlu berusaha ke arah mencapai matlamat itu dengan pendekatan yang unik bagi Malaysia.

"Parti komponen BN perlu berusaha. MCA perlu berusaha. Malaysia boleh mencapai matlamat ini dengan cara tersendiri.

"Bekerjasamalah dalam bidang politik, ekonomi dan sosial dan kita semua akan dapat menghapuskan perkauman dan menerima siapa saja daripada rakyat Malaysia untuk menjadi Perdana Menteri dan mengisi apa-apa jawatan," katanya.

Pada sidang akhbar selepas majlis itu, Perdana Menteri berkata, isu pelantikan bukan Melayu sebagai Perdana Menteri bergantung kepada penerimaan rakyat.

"Inilah sebabnya peranan BN amat penting. Kita (BN) tidak mahu terlalu menekankan terhadap perbezaan. Kita mahu menekankan kepada persamaan," katanya.

Beliau berkata demikian ketika ditanya tempoh yang perlu ditunggu sebelum seorang bukan Melayu boleh menjadi Perdana Menteri negara ini.

Ditanya lagi sama ada ia boleh berlaku sewaktu hayatnya, Dr Mahathir berseloroh: "Ia bergantung kepada berapa lama saya hidup."

Mengulas reaksi anggota Umno terhadap ucapannya itu, Dr Mahathir berkata: "Saya rasa secara umum Umno akan menerimanya... mereka akan menerima pemimpin yang berdedikasi terhadap negara.

"Ia mengambil masa, dan sudah tentunya ahli (Umno) yang membantah. Saya bukannya cuba untuk melakukan sesuatu yang akan menambahkan rasa tidak suka mereka kepada saya, saya hanya berkata yang sebenarnya."

Ditanya sama ada ini bermakna bukan Melayu akan diberikan kedudukan tambahan dalam Kabinet, Dr Mahathir berkata ia tidak mustahil jika perasaan perkauman sudah terhakis dan seseorang itu tidak lagi dikenali melalui bangsanya.

Dalam ucapannya, Perdana Menteri berkata, Malaysia adalah milik rakyat bersama dan sejak Merdeka lagi, semua kaum berjaya merapatkan hubungan serta integrasi antara mereka.

"Sebenarnya kadang kala kita begitu 'Malaysian' sehingga kita tidak dapat mengenali seseorang itu daripada kaum yang mana. Dari segi pakaian dan budi bahasa, Melayu dan Bumiputera sukar dikenali sebagai berlainan daripada keturunan Cina atau India," katanya.

Jika aliran ini berterusan, katanya, beliau yakin prasangka buruk antara

kaum akan hilang sama sekali, dan apabila prestasi ekonomi semua kaum menjadi sama, perkauman juga akan hilang.

Menyentuh Dasar Ekonomi Baru (DEB), Dr Mahathir berkata dasar itu menunjukkan peningkatan ekonomi Bumiputera tidak menjejaskan kemajuan ekonomi bangsa lain.

Bagaimanapun, beliau mengakui ada orang Cina dan Bumiputera sendiri yang tidak berpuas hati dengan DEB.

"Jika kita berkongsi dan bekerjasama, bilangan mereka yang tidak puas hati ini akan berkurangan," katanya.

Ketika ditanya pemberita ada dakwaan DEB telah mencetuskan perpecahan antara kaum, Perdana Menteri berkata sebaliknya dasar itu telah membantu proses integrasi kaum.

"Di sesetengah negara yang tidak mempunyai dasar sedemikian, mereka lebih berpecah dan tidak mengiktiraf bangsa. Mereka mendakwa mereka adalah satu negara tetapi jauh di dalam mereka berlainan," katanya.

Ucapan Dr Mahathir turut menyentuh mengenai kebaikan orang Cina dan Melayu mengadakan lebih banyak perkongsian perniagaan tulen, dengan rakan Bumiputera memainkan peranan yang bermakna.

"Perkongsian Ali Baba di mana Bumiputera hanya menjadi `front' (topeng) tidak menolong proses pemindahan kecekapan dalam bidang perniagaan.

"Saya percaya jika rakan kongsi Bumiputera diberi peranan yang bermakna, sumbangannya kepada perniagaan tetap bernilai," katanya sambil menyifatkan orang keturunan Cina di Malaysia, mungkin lebih cekap daripada orang Cina lain.

(END)